

Pembangkok Janjikan Komitmen Dalam PSC Jika BN Layan Lima Tuntutan Bernama
13 September , 2011

KUALA LUMPUR, 13 Sept (Bernama) -- Majlis pimpinan pakatan pembangkang Selasa menawarkan komitmen sepenuhnya dalam usaha menjayakan penubuhan Jawatankuasa Terpilih Parlimen (PSC) jika kerajaan bersetuju memberi jaminan terhadap lima tuntutan mereka.

Lima tuntutan itu ialah; menerima kelapan-lapan tuntutan Gabungan Pilihan Raya Bersih dan Adil serta menggesa Suruhanjaya Pilihan Raya melaksanakan tuntutan yang termaktub di bawah bidang kuasa mereka; menetapkan tarikh pilihan raya umum secara sepakat antara pembangkang dan Barisan Nasional; memberi ruang yang cukup bagi PSC menjalankan tanggungjawab; memastikan isu pemberian taraf kewarganegaraan kepada warga asing sebagai salah satu agenda perbincangan; dan melaksanakan setiap keputusan PSC.

Naib Presiden Pas Salahuddin Ayub berkata kelima-lima perkara itu harus dijamin oleh BN bagi memastikan PSC melambangkan komitmen dan tanggungjawab kerajaan dalam memastikan pilihan raya umum akan datang lebih telus.

"Kita bersedia untuk tawarkan khidmat, ini bukan untuk kebaikan parti, tapi jiwa besar kita demi kebaikan rakyat, kita sedia tawarkan khidmat bakti melalui PSC, tapi mesti ada jaminan serius dari Perdana Menteri (Datuk Seri Mohd Najib Tun Razak)," katanya pada sidang akhbar di sini.

Salahuddin berharap Perdana Menteri memberi jawapan segera sebelum bermulanya sesi parlimen pada 3 Okt ini.

Menjawab satu soalan, beliau berkata jika Najib tidak memenuhi lima tuntutan itu, pakatan pembangkang tidak akan memboikot PSC tetapi tetap berharap kerajaan mempertimbangkannya.

Katanya surat rasmi mengenai lima tuntutan itu akan dihantar kepada Perdana Menteri dalam masa terdekat.

--BERNAMA

Hakcipta© 2011 BERNAMA

Source:<http://www.bernama.com/bernama/v5/bm/newspolitic.php?id=613145>